

L'Abat Enri GEORGE

Felibre de l'Autar

FREDERI MISTRAL E L'ÈIME CRESTIAN

DINS LOU *POUÈMO DÓU ROSE*

IN MEMORIAM

Crestian, mi fraire,

Fidèu à nosto tradicioun felibrenco, nous vaqui tourna mai acampa dins aquesto poulido gleiseto, per counmemoura lou trenten anniversàri de la mort de Frederi Mistral; pèr nous embuga de soun èime crestian e patrioto; per gramacia Diéu de nous avé baia aquéu geniau sauvadou de nosto lengo, que tóuti n'en soun esta fièr: soun Païs, sa Glèiso, sa famiho, sis ami.

Malurousamen, aven de regreta dos absènci particularimen remarcablo: aquelo, pèr lou segound dóu cop, de sa digno vèuso, Na Mario Mistralenco; emai aquelo dóu Marqués Folco de Barouncelli. L'amo dóu Mèstre e de sa Dono an pas besoun de veni treva sus terro, emé la permissioun divino, pèr vèire se lis ami i'an garda lou culte dóu souveni. Sabon proun de que se n'en teni sus acò. Autambèu l'amo dóu Marqués — en paradis siegue emé li Santo! — douto pas que si gardian fugon aqui pas liuen emé sa courouno de saladello, belèu meme em'uno ègo blanco sènso soun cavalié... Counèis parieramen li sentimen de sa nacioun gardiano!...

Mai se lis ancian dóu Felibrige s'en van à cha-pau dins l'autro vido, fai bon saupre que i'a de jouini gènt counsciènt de soun devé de li remplaça. E se de tristis evenimen li tènon liuen d'eici, en majouro part, fau avé fisanço d'un tèms avenidou que sara meieur; que nous leissara la gau de li vèire emé nautre, nombrous, englouria pèr la souffrènço, afouga pèr manteni la lengo, lis us e lou mouvamen de nosto Reneissènço Prouvençalo. Aven toujours forço estima dins lou Felibrige aquelo qualita douminanto: l'outimisme resonna, la Fe dins l'an que vèn. Es un remèdi contro lou mau-cor, es un soulas, es un sorgènt d'energìo. I marrit jour que sian, aquel outimisme riboun ribagno, aquelo Fe, auran pas fali, dintre nautre, pèr noste bonur. Mai vèici qu'es mestié de pas musa e d'entamena quatecant noste sujet, car avèn de faire un proun long viage.

*

* *